

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06), člana 32. stav 1. tačka 5. Statuta Općine Velika Kladuša („Službeni glasnik Općine Velika Kladuša“, broj: 12/11), člana 72. stav 1. i člana 73. Poslovnika Općinskog vijeća Općine Velika Kladuša („Službeni glasnik Općine Velika Kladuša“, broj: 12/11), Općinsko vijeće Općine Velika Kladuša, na \_\_\_\_ redovnoj sjednici održanoj \_\_\_\_ godine, donijelo je

### ODLUKU

o stipendiranju studenata u akademskoj 2021/2022. godini

#### Član 1.

- 1) U akademskoj 2021/2022. godini Općina Velika Kladuša će dodijeliti stipendije studentima prvog i drugog ciklusa studija po Bolonjskom sistemu, kao i studentima I-VI godine po starom sistemu školovanja (ovisno od dužine trajanja studija), sa područja općine Velika Kladuša koji ispunjavaju opće i posebne uvjete propisane ovom Odlukom i Pravilnikom o dodjeli stipendije.
- 2) Mjesečni iznos stipendije je 200,00 KM i jednak je za sve stipendiste.
- 3) Općina Velika Kladuša će osigurati u budžetu Općine za 2022. godinu iznos od 300.000,00 KM za isplatu 150 godišnjih stipendija.
- 4) Stipendije se isplaćuju za 10 mjeseci, za period od oktobra 2021. godine do jula 2022. godine.

#### Član 2.

Općina Velika Kladuša će u akademskoj 2021/22. godini stipendirati sve studente koji ispunjavaju uslove iz člana 3. stav 1. tačka a-g Pravilnika o dodjeli stipendija (prijave studenata koje se ne boduju).

#### Član 3.

Općina Velika Kladuša će dodijeliti i po 4 (četiri) stipendije za studente deficitarnih zanimanja:

- doktor medicine;
- magistar farmacije;
- diplomirani veterinar ili doktor veterine;
- diplomirani inženjer, master ili bachelor geodezije;
- diplomirani inženjer, master ili bachelor informatike;
- diplomirani inženjer, master ili bachelor arhitekture;
- diplomirani inženjer, master ili bachelor građevine);
- diplomirani inženjer, master ili bachelor mašinstva);
- diplomirani inženjer, master ili bachelor elektrotehnike);
- profesor njemačkog jezika;
- profesor muzičke kulture i
- profesor likovne kulture.

#### Član 4.

Općina će stipendirati i određen broj studenata koji ispunjavaju uslove iz člana 3. stav 1. tačka i. Pravilnika o dodjeli stipendija (socijalni slučajevi), koji je jednak ukupnom broju stipendija koje se dodjeljuju umanjenom za broj stipendija iz člana 2. i 3. ove Odluke.

#### Član 5.

Proceduru dodjele stipendije za akademsku 2021/22. godinu će provesti Komisija za dodjelu stipendija na osnovu akta o imenovanju Općinskog vijeća, a u skladu sa ovom Odlukom i Pravilnikom o dodjeli stipendija, a na osnovu Javnog konkursa.

## Član 6.

Opći i posebni uvjeti za dodjelu stipendije, postupak odobravanja, donošenje odluke o dodjeli stipendije, raspisivanje javnog konkursa, zaključivanje ugovora o stipendiranju i druga pitanja, koja nisu regulisana ovom Odlukom, bit će regulisana Pravilnikom o dodjeli stipendija.

## Član 7.

Ova Odluka stupa na snagu danom objavljivanja u „Službenom glasniku Općine Velika Kladuša“, a primjenjivat će se za akademsku 2021/22. godinu.

## O b r a z l o Ź e n j e

### Pravni osnov:

Pravni osnov za donošenje Odluke o dodjeli stipendija u akademskoj 2020/21. godini sadržan je u članu 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06), članu 32. stav 1. tačka 5. Statuta Općine Velika Kladuša („Službeni glasnik Općine Velika Kladuša“, broj: 12/11), članu 72. stav 1. i člana 73. Poslovnika Općinskog vijeća Općine Velika Kladuša („Službeni glasnik Općine Velika Kladuša“, broj: 12/11).

### Razlozi za donošenje Odluke

Za svaku akademsku godinu Općinsko vijeće odlukom definiše iznos sredstava koji će biti dodijeljen stipendistima Općine Velika Kladuša, a u skladu sa mogućnostima u Budžetu. Odlukom se također definiše mjesečni iznos stipendije, broj stipendija kao i period za koji će se isplaćivati.

Osim toga, Odlukom o stipendiranju studenata se definiše i broj i kategorije stipendista koji imaju pravo na stipendiju (stipendisti čije se prijave ne boduju, deficitarna zanimanja i socijalni slučajevi) i način dodjele stipendije.

### Obrazloženje predloženih rješenja

U članu 1. stav 1. Odluke je definisano kome se dodjeljuje stipendija i u odnosu na prethodnu akademsku godinu nije bilo promjena.

Stavom 2. istog člana je određena visina mjesečne stipendije u iznosu od 200 KM i iznos mjesečne stipendije je isti kao u akademskoj 2020/21. godini.

Sredstva za isplatu stipendija Općina Velika Kladuša će se osigurati u Budžetu Općine za 2022. godinu u iznos od 300.000,00 KM za isplatu 150 godišnjih stipendija (stav 3.).

Kao i prethodne godine, stipendije će se isplaćivati za 10 mjeseci (period oktobar 2021. godine – juli 2022. godine).

Članovima 2., 3. i 4. definirane su kategorije studenata koji mogu ostvariti pravo na stipendiju. U odnosu na prethodnu godinu došlo je do promjene deficitarnih zanimanja, tako što je sa liste deficitarnih zanimanja skinuto zanimanje diplomirani logoped i audiolog ili defektolog, master ili bachelor logopedije i audiologije ili defektologije, jer zanimanja iz oblasti socijalnog rada na Birou rada ima značajan broj. U prijedlogu su dodata zanimanja, koja do sada nisu bila na listi deficitarnih, a za kojima postoji potreba, i to: diplomirani inženjer, master ili bachelor mašinstva; diplomirani inženjer, master ili bachelor elektrotehnike; profesor njemačkog jezika; profesor muzičke kulture i profesor likovne kulture. Ovih zanimanja nema na Birou rada ili ima 1 nezaposleni, a postoji potreba, obzirom na razvoj industrije i potreba škola (nestručno zastupljena nastava iz ovih predmeta).

Članom 5. je propisano da će procedure dodjele stipendija za 2021/22. godinu provesti Komisija koje je imenovana Zaključkom Općinskog vijeća.

Članom 6. je regulisano da se pitanja koja nisu regulisana ovom Odlukom reguliraju Pravilnikom o dodjeli stipendija.

Obrađivač:

Služba za upravu, društvene djelatnosti i zajedničke poslove

Predlagač

Općinski načelnik